



Sabtu, 22 Juni 2024
Ogen : Perb. Rasul 15:22



Ngutus Kalak Si Tek



“Majemuk” e me sada istilah sinuriken kinierbagen. Siakui maka kinierbagen e lit i babo doni enda. I tengah-tengah gereja kinierbagen e lit i jah i je. Gereja selaku perpulungen kalak si tek alu erbage-bage karakter, sikap, perukuren, pendidikan, ekonomi ras sidebanna. La lit manusia si seri kel, pasti lit perbedanna. Alu kata sideban banci sikataken kinierbagen e warna sierbahanca jadi mejile ras unik.

Wari enda ilakoken MPL wari peduaken, tentuna peserta enggo sitandan sada ras sidebanna. Pelain-lain Klasis si ngutus, pelain-lain cara ngidah sada persoalen janah pelain-lain ka cara nuriken pandangan entah pe pendapat. I bas ngerana lit deba kitik sorana, lit ka deba seh gangna sorana, janah lit ka kalak suruhna ngerana nuriken pendapatna. Em ia, enterem jelma enterem erbagena. I bas kinierbagen e uga dage sikapta segelah kinierbagen e la jadi perpecahen, pengotak-ngotken tapi maba kinijilen ras kiniersadan?

Erlajar arah Paulus si melala kel ngelai kalak si labo Jahudi, pelayanen si lakokenna e maba ulih. E maka reh teremna kalak si la Jahudi tek man Kristus Jesus. Selaku kalak si la Jahudi tentuna lit peradaten, cara ngeluh bage pe perukuren si la bo seri ras kalak Jahudi. Guna njaga perpulungen e tetap aman ras ratur, segelah la terjadi perpecahen bas tubuh gerja, arih-arih me Paulus ras rasul-rasul guna erbahan utusen si ngarak-ngarak kiniteken kalak si labo Jahudi. Itetapken me Silas ras Judas berkat ras Paulus ku Antokia guna ngelai. Palasna e me erkiteken kalak enda duana kalak si tek dingen ihamati perpulungen. Peserta MPL e me siiutus dingen i hamati. Erbage-bage pendapat si ituriken bas MPL, lit si teraloken teman lit ka langga teraloken. I bas langa teraloken e ula erbahanca segat ate, nembah ras sidebanna tapi jadikanlah e jadi kebayaken. Ingetlah maka kam iutus sabap tek moria enda man bandu.

☞ *“Kalak mehaga tetap njaga kiniersadan”*



